

欽定大清會典事例

欽定大清會典事例卷一百九十一

戶部

積儲買補倉穀豐年備儲買補運費
嚴禁囤積造麴

買補倉穀。○雍正十一年議准。廣東每年糶三倉穀。自九月以後。數在四千石以下者。定限兩月內買補足數。四千石以上者。三月內買補足數。九月以前有能先買者。聽其便宜買補。○十三年議准。直省各州縣秋成買補倉穀。如遇穀價騰貴。即將所糶價銀解交府庫。俟次年秋收價賤。照數買補。又本地買補。恐有短價派員抑

勒富戶里民等弊。務令於鄰近州縣購買。以杜弊端。○乾隆元年議准。秋收買補倉穀。務擇好穀。照原糶之數買足還倉。其買補價值。照各地方時價。有餘不足。通融撥補。足數給發。不得稍有短少。致有官賠。並派累里民等弊。○二年議准。被災州縣。如有倉糧散給無存者。務於秋收豐稔之時。題明撥銀買補。以實倉儲。○又議准。各州縣平糶倉穀。務於本年秋收。及時照數買補。如逢水旱。本地鄰境價值皆昂貴難買。令該管官查覈確實。將存價緣由咨部。俟次年秋收。

無論價值貴賤。即行採買。如次年仍延緩不買。照玩視倉儲例題參。又凡遇水旱災傷。次年買補價昂。察其實在不敷之數。統計該省糶價有餘不足。通融撥補買足。如該省並無贏餘。即動支藩庫存公銀買補。仍造冊題報查覈。○三年議准。買補倉穀。嚴禁派累小民。及發短價低銀。抑勒交糧。或斗秤以大易小。以重易輕。有蹈此者。或被告發。或被訪聞。即詳揭參究。督撫徇隱。一併參處。○又議准。直省倉穀。春糶秋糶。若秋成穀價仍昂。則就鄰近價平之處。於春月購買。

補足。如鄰近價亦未平。即察其積儲之多寡。酌量緩急。暫停買補。或俟次年麥收豐稔。買麥收儲。秋成易穀還倉。或竟俟次年秋成買穀。隨時酌量辦理。至倉穀無多地方。不便虛懸。令州縣確訪鄰省價平之處。詳明該管上司。委官採買。其原糶價值。不敷採買。於通省糶價內。通融撥補。儻再不足。即將糧價運費腳費。在於藩庫存公銀內。酌量撥給。造冊題報。○又議准。州縣赴鄰封。及產穀地方採買時。將應買數目。報明督撫。行知受買地方。如係隔省。即知會彼省督撫。

轉行知照。俟買足運回之日。取具地方官印結。將米穀數目價值書明結內。於申報採買收倉時。一併送府驗報查覈。如有情弊。即行叅處。○五年議准。浙江倉穀。除偶有偏災收成歉薄者。暫停買補外。豐收之地。將乾隆三年四年糶穀。照數買足。其餘各屬。飭令將三年所糶之穀。全行買補。四年所糶之穀。在四千石以下者。亦全行買補。四千石以上。或緩買十之三。或緩買一半。隨時辦理。○七年議准。江西湖廣素產米穀。於有收之歲。自七八月以至十二月。將本地附

近水次各屬米穀價值。每月據實咨報各省。以便採買。若各省已赴採買。而江廣等處適值價貴。即於存倉穀內酌量撥運。將鄰省價銀留儲。俟秋成照數買補還倉。○又

諭從前廷臣議買補倉穀。以本邑之贏餘為本邑之撥補。其他州縣不得通融。如歲歉穀價昂貴。不敷採買。准其展限。朕思地方積穀。原以備民間緩急之需。必及時買足。方於儲蓄有益。若一概不許通融。而無贏餘之州縣。或又值歲歉價昂。咨部請展。則倉儲必致久懸。非濟民利用之道也。嗣後如州縣當秋成之時。

穀價高昂。不能買補。而該處存倉穀石。尚可接濟者。照例展限於次年買補。儻穀價既屬不敷。而儲倉穀石。又係不足。准其詳明上司。以別州縣穀價之贏餘。添補採買。為酌盈劑虛。挹彼注茲之計。該管督撫一面辦理。一面奏聞。又前奏請減價糶穀。於成熟之年。每一石照市價覈減五分。米貴之年。每一石照市價覈減一錢。此蓋欲杜姦民賤糶貴糶之弊。但思尋常出陳易新之際。自應遵此例行。假若荒歉之歲。穀價甚昂。止照例減價一錢。則窮民得米。仍屬艱難。不能大霑恩澤。嗣後著該督撫臨時酌量情形。將應減若

干之處。豫行奏聞請旨。如有姦民賤糴貴糶之弊。嚴
拏究治。○八年議准買補倉穀。如果一時買難足數。
本地有穀之家。情願出售於官者。議定價值。必
見穀交銀。官為經理輓運。毋得豫發價銀。強行
派買。亦不得勒令賣戶上倉交納。以致愆期捏
報。擾累民生。○九年

諭積貯乃民食所關。從前各省倉儲。務令足額。原為地
方偶有水旱。得資接濟。是以常平之外。復許捐貯。多
方儲蓄。無非為百姓計。後因糴買太多。市價日昂。誠
恐有妨民食。因降旨暫停採買。俾民間米穀自在流

通價值平減亦無非為百姓計也。乃近聞各省大吏竟以停止採買為省事。不思常平之設。不特以備荒歉。即豐稔之年。當青黃不接之時。亦得藉以平糶。於民食甚有關繫。從前所降諭旨。總在督撫大吏奉行之時。將實在情形。籌酌妥協。其間因時制宜。原不可執一定之見。今因停止採買之令。遂任倉廩缺少。置而不理。將來必致糶借無資。固非設立常平本旨。又豈朕停止採買之本意乎。各省督撫。務須斟酌地方情形。留心辦理。應買則買。應停則停。總在相機籌畫。不可膠執定見。希圖省事。○十一年

諭各省積貯。原以備地方荒歉之用。今歲豐稔之處尚多。正宜趁此時留心籌畫。豫為積貯民食之計。俾不致穀賤傷農。但必以本地之穀補本地之倉。恐收成分數不齊。產米多寡不一。或因一時採買。米價又致昂貴。有妨民食。著各該督撫酌量所屬地方情形。有二麥既豐而秋成又稔者。動撥屢年所存穀價。分路採買。亦不必迫期足額。務須妥協辦理。使倉儲可以漸充。而米價不致增長。○二十二年

諭地方水旱不齊。國家所藉以撫恤災黎。所待以仰給者。惟倉儲是賴。一有缺額。自應亟為籌補。然籌補之

法不待更立章程。惟在督撫實心整飭而已。前因各省爭議採買。一時米價翔湧。是以議立定額。邇年以來。市價不致過昂。此其效也。然額定而缺者不補。則緩急其奚恃焉。督撫身任封疆。民瘼所關。自當詳加覺察。時時留意。豈可因循玩視。而不為先事計耶。截漕出自特恩。原不為例。非可屢邀也。可將此通行傳諭各督撫知之。○二十八年奏准。各省督撫每月奏報糧價之時。將各州縣米穀麥豆各項糧價細數。造冊咨部存案。凡遇糶買報銷。按照成例。參酌時價。覈實辦理。○三十一年

論各省倉穀積貯。務須籌備充裕。儻有缺額穀石。俱即動項如數買補。嗣後如有本省庫項不敷。應行請撥之處。該督撫等確覈情形。隨時據實奏聞。候朕酌量撥給。○三十七年議准。各州縣春糶秋買穀石。或因時價昂貴。例得緩買。致通案不能報銷。嗣後報銷現年買補倉穀之時。將節年緩買項下。續買若干。動用腳價若干。仍未完若干。分別年限。彙造清冊。同現年買補之冊。專案咨部報銷。○四十七年議准。浙江各州縣。春閒平糶之後。該管知府將糶價銀兩。提儲府庫。秋禾登場之後。即

責成知府督飭州縣領價買補上倉盤驗結報如實有災歉價昂不敷購買情形由府覈實加結通報始許暫緩其腳價稍需添補不難通融籌辦總不得濫請緩買儻玩視倉儲即行一併揭叅分別議處○四十八年議准山東雜存穀價俱令寄存司庫至應行買補之時即將原銀發還由該管道府出具有實在買穀存倉甘結送司查覈○五十一年奏准採買缺額穀石令該管知府直隸州確查地方產穀豐嗇及市價低昂詳明督撫出具印結領價遴委妥員監視採

買。隨買隨收。立限交倉。不許轉發該州縣自行買運。買竣之日。該府州驗明確數。具結通報。仍由該管道員覆驗。加結移司。彙送督撫查覈。儻有虛捏未買。混報已收。將該州縣照虧空例。揭叅治罪。該管府州一併嚴叅。○嘉慶五年

諭採買一事。遠赴鄰封。自需運脚。若地方官以運費無出為詞。因之派累閭閻。巧為朘削。是便民而轉致累民。嗣後除各省附近水次舟楫可通地方。著即於鄰境採買外。其不通水路者。仍准其在本地採買。不必遠赴鄰封。該督撫等惟當督飭所屬。公平採買。以期

民無擾累而倉歸實貯。儻有短發價值。以及勒派折收等弊。經朕訪聞。或科道糾參。則惟該督等是問。○
道光十九年議定。湖北採買常平倉穀。地方官自赴產穀之處買補。不准向民間浮派需索採買。其採價不敷。除該省按年自行籌捐銀一萬兩外。其借動地丁銀四萬兩。發商生息。歲收息銀。以二千兩歸還成本。造入撥冊。以二千兩提存司庫。酌量津貼。免其造冊報銷。其成本歸清後。每年息銀二千兩。另款收入撥用。遇有交代。結內聲明實儲存倉。不准以穀價流抵。儻有虧

缺。即照時價買補還倉。不准以例價折交。如遲延不買。虛出倉收。以及浮收折派。短發價銀。捏報價昂。浮銷津貼等弊。嚴叅懲辦。○二十六年議准。直省州縣採買常平倉穀石。領價後。勒限六箇月買補。逾限不買。即由藩司查取職名咨叅。罰俸一年。再限三箇月買完。儻限滿仍有未完。革職留任。如查有虧缺。即行嚴叅。○二十七年議准。州縣買補倉穀。未完捏報全完者。革職。該上司徇庇不叅。降三級調用。失察者。罰俸一年。○又議准。州縣採買倉穀。如有勒派具領。暗

收折色及短發價值者俱降三級調用。○同治

三年

諭為政之要首在足食各直省州縣設立常平社倉國家承平留以備凶荒之用一旦有事恃以為緩急之需所以為未雨綢繆之計者法至善也近來軍務繁興寇盜所至地方每以糧盡被陷推原其故總由各州縣恣意侵挪忍令米粟空虛遇變無所倚賴又或聞警逃遁齎盜以糧以致守禦無資生民塗炭興言及此罪有攸歸嗣後各省常平社倉責成督撫大吏認真整頓廢者復之缺者補之隨時稽查凡官倉民

倉未動之穀。不得變價提用。至於倉穀已缺。紳民捐貲彌補者。尤應加意保全。務使倉穀豐盈。以期有備無患。此旨著該部迅即通行各省。即著各該督撫將各該州縣倉儲實存若干。有無虧缺。查明據實覆奏。儻復因循玩忽。任聽州縣侵漁虧缺。定將該上司及州縣一併從重懲處。用示朝廷貴粟重農之意。

豐年備儲。○康熙十九年

諭。浙江動支庫銀四萬兩。往湖廣江西糴米平糶。建備米倉廩。奉天等處城守徵收雜稅。令於米價賤時購貯。名曰備米。遇有緊急。以資撥用。○二十年奉

旨。閩省被災。准其赴潮州等處買米接濟。如有藉端通海者。事覺。將該督撫及押運官一併治罪。○二十四

年

諭。山海關古北口張家口等處。積貯米穀。以備蒙古飢荒。令戶部官監視運送。蓋造倉廩。○二十九年議准。奉天錦州二府地丁錢糧。每年存贖銀五千餘兩。酌量米價賤時。陸續採買。其部員所收牛馬稅銀三千餘兩。交與倉官。亦酌量買米收儲。其倉內出陳易新。交與奉天將軍管理。並盛京戶部侍郎稽察收儲米穀。每年仍將出入數

目報部。又

諭足民之道。宜裕蓋藏。從來水旱靡常。必豐年恆有積貯。庶歉歲不憂飢饉。如康熙二十七年。頗稱歲稔。誠使民間經營搏節。早為儲待。何至二十八年。偶遇旱禱。室皆懸磬。總因先時無備。遂至餬口維艱。比蠲除正賦。特發帑金。分行賑濟。被災之衆。始獲安全。今霖雨時降。可望有秋。惟恐愚民不知愛惜物力。狼藉耗費。止為目前之計。罔圖來歲之需。應行各督撫飭令及時積貯。庶終歲所食。常有餘儲。用副朕軫念民依。綢繆區畫至意。○又議准。山東秋成豐熟。不論高粱

穀石。每畝捐出三合。合省計得二十五萬餘石。在各州縣適中大鄉之內。各保殷實敦厚之人。加意收儲。以備荒年。○三十年

諭山西平陽等處麥田大熟。著遣堂官一人前往。照時價採買積貯。○三十一年

諭去歲陝西西安等處年穀不收。罔有積貯。以致閭閻困苦。已遣官賑濟之矣。直隸所轄地方。素有儲蓄。或州縣稍有不登。即以所貯米穀賑給。是以民生獲濟。今年豐歉尚未可知。陝西省府州縣現存米穀之數。應行查明。先行豫備。至各省府州縣。皆令積貯米穀。

數千石。則裨益黎庶者大矣。○四十三年

諭。山東昨歲歉收。江南乃產米之地。又水陸易於輓運。著總河等從江南買穀。運至東省交倉。○雍正三年

諭。湖廣為產穀之鄉。運往別省。皆為近便。今歲收成豐稔。著該省督撫動支庫銀十萬兩。買穀於省倉及府州縣應貯之處。加謹收貯。但須陸續採買。不可致穀價騰貴。設民間穀價稍昂。即行停止。以待來歲秋收。江南浙江。今歲均獲豐收。著各該撫就近商酌。若買穀有益。即動項採買。定數奏聞。○四年

諭。聞山東登萊青三府連年豐稔。商販自東而西者。絡

繹不絕。著該撫酌量動帑採買。分貯於濟南等屬米少之州縣。著勸諭各商販多運至濟南等三府。俾民間得以收買存貯。則明歲青黃不接之時。米價不致騰貴。○七年

諭奉天地氣乾燥。不比南方潮溼之區。正當乘此豐收之時。以為儲蓄之計。著該地方官通行曉諭勸導。若有穀之家。果能留心積貯。至於穀多價賤難於出糶者。著即奏聞。朕當發官價糶買。或從海道運至京師。俾積穀之家。實獲利益。必不使有穀賤傷農之歎也。

○又奉

旨。民戶贏餘之穀。原期出糶以為日用之資。若本地糶穀者少。則出糶艱難。不可不為計及。著該地方官酌量本地情形。不必相強。若有將贏餘之穀情願出糶者。著動支官銀。照時價糶買。存貯公所。明年儻有需用。聽辦軍餉之大臣。及該督撫行文支撥。西安現有備用銀。即可動用採買。再於西安藩庫撥補還項。此朕體恤民戶。俾糶穀得價用度豐裕之至意。著地方官善於奉行。不可勒令糶賣。生事滋擾。○九年議准。山東被水州縣。賑濟所用之穀。於通省現存新收粟米。撥十五萬石。揀派科道官二人。動支

帑銀。往天津等處。率地方官買粟五萬石。共二十萬石。發與同空糧船。帶至山東。令於德州常豐臨清等倉收儲。再於奉天撥粟二十萬石。由海運至天津。再雇民船運至德州。交與山東地方官運送。其東昌以下之近水州縣。將江西湖廣漕運截留三十萬石。令該撫分撥存儲。○十一年議准。浙江每年令該督撫酌定米數。於秋收時動項赴湖廣等處採買。分儲省城永濟倉。及杭嘉湖所屬州縣。以備歉歲平糶之用。○又議准。福建臺灣鳳山縣積穀。酌撥十萬石。赴福

興漳泉四府分儲。來歲將平糶銀發交臺灣。秋成採買還倉。○又議准直隸於永平府屬量撥穀八千石。運送喜峯口建倉存儲。添設巡檢一員。以專責成。○十三年題准直隸二麥豐收。以奏准司庫存公銀內。給清河道二萬兩。天津道萬兩。大名道三萬兩。霸昌道萬兩。河間府二萬兩。分發各屬麥多價平之州縣。儘數採買收儲本處倉內。每年易穀積儲。於年終造冊報部查覈。○乾隆元年題准江西早穀豐收。酌動存公銀買穀十萬餘石。分儲各府州縣。以裕本省之

蓋藏兼備鄰封之緩急。○三年

諭。今歲山東河南二省。麥秋大稔。但恐小民於有餘之時。不知搏節。耗費於無用之地。如躑躅耗麥地方。更當嚴禁於斯時。毋以二麥豐收。遂可稍弛其禁。至於鄰省需麥之處甚多。以本地之有餘。濟他省之不足。而貿易之利。亦在其中。務使商販流通。彼此均受其益。如果再有餘糧。即著地方官動支庫帑。照時價糶買。存貯公所。以為餘蓄。不使有穀賤傷農之慮。但不可繩以官法。勒令交易。致滋擾累。著該撫善為經理。

○又議准。江南各屬麥收豐稔。小民有餘之麥。

必將急於糶賣。既恐價賤傷農。兼恐姦商富戶
囤積射利。或販賣出境。均於民食有關。應令各
屬詳察本境情形。如果二麥有餘。價值平減。或
將平糶米穀價銀。或於司庫撥項。在麥糧聚集
處所。照市價收買存倉。不必拘定數目。若麥少
價昂。即行停止。所有麥石。俟秋禾一有定局。或
易穀存倉。或動撥濟用。○又奏准。今歲口外收
成豐稔。八溝等處。民間雜糧甚多。難於出糶。乘
此糧多價賤之時。令地方官按市價給發官銀
採買。○四年

諭湖北今歲麥秋豐稔。又豫省河以南麥已大熟。當此有餘之時。必須酌盈劑虛。始於民生有益。直隸江南上年歉收。今歲麥秋雨又愆期。可行文直隸總督。會同河南巡撫。酌量市價民情。委官採買存貯。俟直隸需麥之時。以便撥運。湖北與江南鄰近。其應否採買接濟。有便民食之處。亦行文江南督撫。會同湖北巡撫商酌辦理。○又議准。川省秋收豐稔。米價平減。應動藩庫。乾隆八年分雜稅銀三萬兩。地賦銀十二萬兩。委官於成都等六府州縣附近水次。出產米穀最多處。分行採買。交該地方官。於沿江

州縣空出倉廩內。加謹收儲。其採買不拘額數限期。但遇米價加增。即行停止。○十年

諭准徐海三屬州縣倉儲多缺。現存糶價積至十四萬兩之多。未曾買補。朕思三屬乃係常被水患之處。積貯尤關緊要。何以存貯銀兩。不豫於豐收之地買補。及至被災。仍欲於本地採買。徒增時價。於民何益。已降旨諭令於所屬豐收地方。或麥或穀。委員採買。○五十一年奏准。四川本年秋成豐稔。糧價平減。酌於附近水次各州縣。分買穀三十萬石。平買實儲。以為接濟鄰封之用。○嘉慶四年

諭國家設立常平倉穀。原備民間緩急之需。若不照額存貯。僅將穀價貯庫。猝遇需米之時。豈銀兩所能濟用。日久挪移。並有穀價亦屬虛懸者。有名無實。均屬不成事體。著通諭直省各督撫通行所屬。一體稽查。據實具報。如有缺額及存貯穀價之處。以本年秋收為期。除被災州縣酌量情形。另行勒限買補外。其餘各州縣。務令及此豐收。買補實貯。不得仍前僅存穀價。或恐市價增昂。惟當臨時調劑。不得藉詞搪塞。並嚴禁各衙門書吏剋扣抑勒諸弊。儻敢虛應故事。並不實力整飭。一經發覺。必將各督撫及原虧各員。分

別治罪。毋謂誥誡之不豫也。○五年

諭。各省倉儲。關係各省民食軍糈。若於地方年歲豐稔之時。不行買補足數。設遇一隅偏祲。或他省有需用之處。何以接濟。此皆守土大臣所應隨時經畫者。儻經此番訓諭之後。各督撫等於倉儲仍不肯實力整頓。一經查出。必當重治其罪。○又

諭。向來各省採買穀石。原應按限補足。以實倉儲。然各省收成分數。豐歉不一。亦須分別辦理。即如本年四川陝西湖南廣西等省。有得雨較遲州縣。浙江江西福建等省所屬。間有被水州縣。各該處收成未免歉

薄。若將倉穀一律採買。轉於民食有妨。著通諭各督撫等。除秋收豐稔省分。均當及時買補。報部查覈外。其各省內有收成稍減之州縣。不妨暫緩採買。俟穀多價賤之時。再行採辦。嗣後各省辦理買補。均須各按年歲情形。分別查辦。以期民食倉儲。兩無妨礙。

買補運費。康熙三十一年

諭聞西安米價仍貴。流民還原籍者稀少。朕為陝西地方民生。常縈於懷。聞自湖廣襄陽至陝西商州。水路可達。應將目下運到襄陽米二十萬石。水路運至商州。自商州運至西安。照湖廣價值。加算所運腳費。與

之貿易。則米價即平。於百姓大有裨益。所得價。齎至湖廣。復買米糧。依法轉輸平糶。俟陝西流民悉還本籍。米價既賤之後。方行停止。○雍正十三年。覆准倉穀春糶秋還。其折耗並腳價等費。在所不免。如遇秋糶價賤。除諸費外。果有贏餘。應聽該州縣自行據實詳明。以備地方平糶賑濟之用。該管上司。不得藉端要挾。勒令多報。○乾隆三年。覆准平糶糧米。既令運米至鄉糶賣。又令四鄉分路採買還倉。應酌量道里遠近。給予腳價。覈明應需銀數。在於藩庫存公項內。先行借給。仍於

糶糧贏餘價內照數還項。○又覆准買補之時。時價或有不敷。及赴鄰邑並江廣產米處購買。其盤費運腳。如州縣自有贏餘。即於贏餘內動用報銷。若本郡邑並無贏餘。則申請於別屬贏餘內通融撥用。儻別屬亦無贏餘。則於藩庫存公銀內給發。○又覆准運穀到鄉平糶腳價。即於米價內支銷。○又覆准動撥湖南倉穀十萬石。運往閩省備用。委總運官二人。協運官四人。在岳州賃船。編列字號。分別抵蘇。其運穀水腳。湖南至江南。每石給水腳銀一錢五分。貴時加

增。每石外加耗穀五合。每石酒錢三釐。神福三釐。舵工一釐。自湖南至漢口。沿途剝淺。官給半費。餘出船戶。由漢口以東。直至鎮江。進插至蘇州。凡有剝淺。官為給費。經過關插。船料穀稅。咨明該監督。概免收稅。各船由雇定之日起。以開帆之日止。中間放水守空。船戶水手。日給米一升。各府州縣。由小河運至湘潭及長沙。岳州。除貼近水次。大船不給運費外。其餘每百里。每石給銀一分。由府州縣倉運至水次上船。需用腳費。酌量遠近給發。至會齊處。盤上大船。每石給

銀一釐。總運官每人日支飯銀五錢。協運官每人日支三錢。跟隨僕役及所雇照看人夫。每名日支五分。均自收穀上船之日起。赴江回楚之日止。至官役同時。別雇船費。每人酌給銀十兩。僕役每名酌給銀三兩。○七年議准。江蘇倉糧運費。凡係官塘大河。及內河寬深舟運易行者。每米穀一石。每百里給水腳銀八釐。內河小港淺窄之處。給水腳銀一分。陸路擔運。每里給腳價銀一釐五毫。○又覆准。本邑運鄉平糶所用腳價。照例在於存公銀內給發。儻存公銀不敷。

臨時酌量於正項內報部撥給。○八年覆准。廣西大河舟楫相通之府州縣。每站百里。不分米穀。每石給水腳銀一分五釐。小港支河之府州縣。每站給銀二分。再搬運上倉下船。每石每里給腳價銀二釐。不通水路之府州縣。遇山路險峻。每石每里給腳價銀二釐。平坦之路。給銀一釐。○又議准。四川所儲水次米穀。若遇鄰省需糧接濟。凡碾運各費。令該省交給委官。齎帶赴川。自行領運。應還糧價。亦令該省照數解川歸款。○又覆准。四川撥運米穀。大江運價。三四九

十等月。水勢停緩。每石每百里。順水。給銀七釐。逆水。給銀一分四釐。正二。及十一。十二等月。水稍乾涸。順水。給銀九釐。逆水。給銀一分六釐。小港。每石每百里。順水。給銀一分六釐。逆水。給銀三分二釐。陸路平坦處。每里給銀一釐五毫。半坦處。給銀二釐二毫。崎嶇處。給銀三釐。自五月至八月。大江水勢汎濫。止可隨時辦理。難以酌定章程。○又議准。直隸撥運米穀。水運。每石每里。給銀一毫五絲。陸運。每石每里。一釐。運送

陵糶米豆。因無回頭載運。每石每里。給銀一釐四毫。○

又覆准。山東運糶米穀。陸路每石每百里給銀一錢。水路二分。○又議准。奉天運糧。每石每里給銀一釐二毫。○又覆准。浙江撥運倉糧。陸路每石每里七毫。險路一釐五毫。水運官塘大河。每石每十里一釐。小港淺窄處。每石每十里一釐五毫。○又議准。山西撥運米穀。不分平險。每米一石。每百里給銀一錢。穀一石。每百里給銀六分。○又議准。江西撥運糧米。凡河內水窄。下水。每石每站給銀一分。上水一分二釐。大江寬路。每石每站下水五釐八毫。上水六釐九毫六

絲。○又覆准。河南水運米麥。每石每百里給銀一分。陸路一錢四分。水運穀稻。每石每百里給銀八毫。陸路八分。○又覆准。湖北撥運米穀。如水路易者。每石每百里給銀七釐。難者一分二釐。陸路易者。每石每里給銀一釐。難者一釐五毫。○又覆准。湖南撥運米穀。大河每石每百里順水給銀五釐。逆水七釐。小河順水每石每六十里給銀七釐。逆水一分。險灘順水給銀一分。逆水一分二釐。其陸路平坦。每夫擔穀六斗。米四斗。每六十里給銀五分。山路給銀六分。山路

難行。給銀七分。○又覆准。安徽撥糶米穀。凡係濱江大河。每石每站。給銀六釐五毫一絲。內河小港。水淺狹小之區。每石每百里。給銀一分。溪水淺。每石每站。給銀一分八釐。溪江沙灘。每石每站。給銀二分。其陸運平坦大道。每石每里。給銀一釐。路稍崎嶇。每石每里。給銀一釐五毫。山路崎嶇。每石每里。二釐。山嶺紆折之區。每石每里。給銀三釐。○九年覆准。陝西撥運米穀。水路每石每百里。給銀四分。陸路平坦大道。每石每百里。一錢。山路崎嶇。邊方荒僻。每石每百里。

一錢六分。○又覆准甘肅撥運倉糧。無論河東河西。每石每百里。概給銀一錢三分。○又覆准雲南運送米穀。平坦大路。每石每站給銀一錢二分。道路崎嶇者。每石每站給銀二錢。○又覆准貴州輓運米穀。陸路平坦程途。每夫每里給銀一釐。險峻道路。每夫每里給銀一釐八毫。○又覆准廣東撥運米穀。平坦陸路。每石每里給銀三釐。崎嶇之路。每石每里給銀四釐。車載每石給銀一釐。水程下水。每石每百里給銀七釐。上水一分。海運七分。○又議准福建水路運送。

溪灘淺窄順流之處每十里每穀一石給銀八毫。米一釐。深通寬暢之處每百里每穀一石給銀六釐。米八釐。上灘逆流每十里每穀一石給銀一釐。米一釐五毫。其陸路每石每里銀七毫。平坦道路每石每里擔夫銀一釐。山路險峻銀一釐五毫。○二十三年

論陝西省延安榆林沿邊一帶米價昂貴現撥甯夏倉糧以資協濟而雇車領運若照定例給以官價窮民往返未免拮据著加恩將靖邊定邊榆林懷遠四縣領運車畜除官價外每石每百里加銀五分回空仍

給半價。其將來甯夏軍需各項運竣。仍令運糧前往協濟。所有車輛牲畜。亦照此例一體賞給腳價。以示優恤邊氓之意。○四十一年議准。奉天採買撥運倉糧。陸路每石每里給銀一釐二毫。水路每石每里給銀一毫四絲。由海運至直隸天津內河。每石給銀一錢四分。直隸採買糧石。在本境買回者不給。如賑糶撥運。有赴鄰近採買。自外運至本境。又自本境運至倉廩及設廠處所者。准給腳價。其自通至津出口。及運至北倉米石。又自奉天等省由海運回米石。內河運腳。概照水程。

每石每里給銀一毫五絲。江西採買撥運米石。陸路過山過嶺。每百斤每里給銀一釐。如一時急需撥運。水遠陸近者。亦准陸路給發腳價。又上倉下船。每石每里給銀二釐。照里數加減。水路凡大江大河大湖。上水下水。俱以一百里為一站。其灘河下水。亦以一百里為一站。若溯流而上。灘險難行。以六十里為一站。小河阻淺盤剝。無論上水下水。每石每站。俱照正運水腳。算里數給發。大河阻淺盤剝。亦無論上水下水。每石每站。給銀三釐。照里數給發。福建採買撥運。

米穀海運自江南上海至閩。每米一石。給銀九分。每穀一石。給銀六分。自浙江乍浦至閩海。每米一石。給銀七分四釐八毫。每穀一石。給銀五分一釐。浙江採買米穀。陸路平坦挑運。每石每里給銀一釐。過壩盤塘。每石給銀五毫。水路如係外江撥運。每石每里給銀五絲。遇有剝淺。按時酌給。山溪穉運。每石每里給銀二毫。湖南採買撥運米穀。水路上倉下船。每石每里給銀二釐。雲南採買撥運米穀。陸路通衢大道。夫運每石每站給銀一錢三分五釐。馬運每石每站給

銀一錢八分。僻處山陬。夫運每石每站。給銀一錢六分五釐。馬運每石每站。給銀二錢。水路寬處。每石每里。給銀四毫。溪河淺窄。每石每里。給銀五毫。貴州常平米穀。俱在本境採買。不給運費。○又議准。奉天海運豆石至天津。押運官員每員。日給飯食銀一錢。每兵役一名。日給飯食銀五分。陸路回省。日給車腳銀一兩。又每豆一百石。准銷席片六領。秫秸二十束。以作裝船鋪墊。直隸由口外採買糧石至省。准給口袋。每條賃價銀四釐。山東撥運鄰省糧石。押運官每員

日給盤費銀一錢。跟役每員四名。每名每日給飯食銀五分。江西撥運外省米石。押運官役。盤費飯食。分別水陸。隨時酌給。凡走長江船戶。水手放水守空。每名按日給米一升。以雇定日起。開幫日止。其本省零星採買撥運。隨雇隨裝者。不給。若於本省鄰境僻地。遇有急需。應用數多者。小船溯流盤灘而上。准給腳價。如撥運數多。小船難雇。需用原船循環裝用。凡回空行走之日。全給食米。浙江永濟倉。無額設。筴斛等夫。凡遇運米出倉。每石給筴夫銀一釐。斛夫銀一釐。

張縷夫銀二毫五絲。攬肩夫銀二毫五絲。馱夫銀二釐八毫。口袋賃價銀五釐八毫。以庫平紋銀九三折給。○又奏准撥借鄰邑穀石。仍令運還本邑。殊覺拘泥。糜費運脚。嗣後各州縣遇有應還鄰穀。可以劃抵者。隨時籌辦。報部查覈。

嚴禁囤積造麴。○康熙三十二年

諭今歲畿輔地方歉收。米價騰貴。通倉每月發米萬石。比時價減少糶賣。止許貧民零糶數斗。富家不得多糶轉販。又蒸造燒酒。多費米穀。著戶部速移咨該撫將順永保河四府屬蒸造燒酒。嚴行禁止。○四十八

年

諭湖廣江西之米。或浙江富商。或土著人民。某人於某處買米石若干。清查甚易。應行文湖廣江西督撫。委賢能官。將有名馬頭大鎮店。買賣人名姓。及米數一併查明。每月終一次奏聞。並將奏聞之數。即移知江浙督撫。湖廣江西之米。不往售於江浙。更將何往。此米衆所共知。則買與賣不待申令。而米之至者多。即大有利於民也。○五十五年覆准。山東河南兩年大熟。

京師麥價。未見平減。皆由商賈豫行收買。久儲不

得均糶所致。行文山東河南巡撫查明由水路
北來賣給商賈米穀數目。每月奏

聞。仍知會直撫。凡本處商賈有多買久儲者。嚴行禁
止。其已至直隸麥穀數目。亦令直撫查明。每月
奏

聞。除沿途照常買賣外。富商人等有多買久儲。亦令
嚴行禁止。沿途地方不肖官役。或有藉名稽察。
留難勒索者。該撫題參治罪。○六十年

諭京師禁止買米居積。係府尹專職。並交與八旗都統
步軍統領等。一同嚴行禁止。○雍正四年覆准。平糶

之時。如有姦商勢豪。居積射利者。即時訪拏。按律治罪。該州縣官不嚴行查禁。該督撫題參。交部議處。○乾隆二年議准。燒鍋一事。各省情形不同。應令各該督撫。就近省情形。因時制宜。以觀成效。躉麴一項。係燒鍋盛行之源。躉麴多則私燒廣。有損蓋藏。嗣後違禁私燒者。照違

制律。杖一百。廣收新麥。躉麴開燒鍋者。杖一百。枷兩月。失察地方官。每一案降一級留任。失察至三案。降三級調用。如官吏有賄縱等弊。照枉法律計贓論罪。○又議准。嗣後五城發糶官米。如有

姦民串買囤積至四五十石。及買作燒鍋之用者。俱嚴行查拏治罪外。其餘肩挑背負。不過數石者。概免查究。○三年

諭直隸山東河南等省。上年秋成歉薄。穀價昂貴。今春山東河南得應時雨澤。二麥可望有收。則本省鄰省皆可資其接濟。無如小民愚昧。往往不知樽節。而耗費麥之最甚者。莫如躉麩一事。朕聞每年麥秋之際。地方有富商大賈。挾持重貲。赴各區大鎮水陸通衢。販賣新麥。專賣與造麩之家。以圖厚利。而造麩之家。蓋成邱房。廣收新麥。惟恐其不多。小民無知。但顧目

前得價售賣。不思儲蓄為終歲之計。而此輩姦商。惟以壟斷為務。不念民食之艱難。此實閭閻之大蠹。不可不嚴禁重懲者。如山東之臨清。江南之鎮江。此弊尤甚。中外共知。朕思商民販麥。則糧食疏通於百姓有濟。不必稽察。致有阻滯。惟查明躉麴之家。嚴行禁止。違者從重治罪。則有用之麥。不致耗費於無用之地。於本省鄰省均有裨益。著該督撫等轉飭各地方官。實心奉行。毋得視為具文。苟且塞責。儻稽查不力。仍有違禁私躉者。經朕訪聞。必將地方官從重處分。不稍寬貸。即督撫亦不得辭其咎。○十五年

諭近來京師米價稍昂。時屆隆冬。小民艱於餬口。著將八旗米局。現在收買存貯米石。照時價酌減發糶。如有不敷。著於京倉支領。五城由京倉各領米一千石。照八旗定價。一體設廠平糶。交該御史等嚴行稽察。毋令囤戶乘機射利。查出從重治罪。○二十四年

諭燒鍋曬麩。例有明禁。邇來屢經降旨。令地方官嚴行查禁。毋使糜費米糧。乃有司視為具文。奉行不力。遂致鄉邑愚民。違禁私燒。竟成利藪。向來例禁。或以收成豐稔之年。如苦澁高粱。細碎糠粃。原無關於小民粒食之需。然不力為禁止。則苦澁細碎之不已。必至

及於精鑿。其為耗穀累民。甚有關繫。司民牧者。正當及時加意寶查。實力禁防。以重民依。而平市價。儻因有此旨。而姦胥蠹役。因之苛索滋擾。則惟於辦理不善之地方官是問。○二十五年

諭。上年因得雨稍遲。糧價易致增長。是以節次酌設五城各廠米豆草束。多方籌畫出糶。以平市價。而麥麩一項。至今源源接濟。現在河南麥石。將次糶完。而山東五萬石。已經續到。江南十萬石。亦已連艘北上。且商販以時轉運流通。當此冬雪優霑。春膏疊沛。秋苗青葱暢茂。所有現在麥價。尤當日就平減。乃據順天

府尹奏報現今時價較上半月每石加增三錢此必
其中姦商市販巧為牟取以致翔貴若此國家立法
調劑原屬因時制宜非可援為定例且前經降旨將
官員俸祿先行借放原期米石倍為充裕而商販等
乘時落價收買存積及至支放已停則乘機昂貴京
城重地設官糾察彈壓至為詳備顧任一二刁民乘
閒居奇甚至齊行把持累及閭閻口食而莫之懲儆
可乎著步軍統領衙門會同五城御史順天府嚴行
飭禁如有藉此多收囤積高擡市值者即行查拏究
處以為逐利病民者戒○二十六年議准向例地方

官辦理平糶。赴糶者俱限以升斗。止許零星糶買。雖有巨商挾重貲以圖倍利者。亦無所施其技。立法甚嚴。惟是不肖行戶。聞有誘買無賴窮民。給予零星價值。令行赴糶。糶得之米。仍入行鋪之手。聚少成多。重利可致。糶係貧民。而利歸商販。狡獪之術。禁遏宜嚴。至若串通經手胥役。蒙混官司。以致冒濫。尤不可不防其漸。應由直隸總督嚴飭地方官。於平糶時。查出前項情弊。照例治罪。○三十四年奏准。通州人民不得於通州及近京地面。私立米局。囤積俸米。若地方

官不切實查拏。照例議處。至各該處賣米行店。不係囤積俸米者。胥役仍不得藉端滋擾。○嘉慶元年議准。倉穀出糶之時。該督撫轉飭地方官嚴禁囤戶。地方官若不嚴行查禁。照溺職例議處。○嘉慶十九年

諭給事中楊懌曾奏請禁姦商囤積米糧以濟民食一摺。本年安徽省缺少雨澤。糧價增昂。前據巡撫胡克家奏。動撥藩庫銀二十萬兩。委員分赴鄰省採買米石。運至該省備用。業經降旨允准。今據該給事中奏。該省廬州六安毗連之雙河鎮三河鎮一帶。有呂姓

米商修蓋倉房。沿河七十餘里。盤踞多年。每歲積穀百餘萬石。賤買貴賣。倉名有二十八豐號數。其餘分戶囤積者。尚復不少等語。從來通商所以便民。若當市糧昂貴之時。貧民需食孔殷。豈可任令姦商居奇牟利。著胡克家即委員查明該商囤積糧石數目。官為平定價值。開倉出糶。俾穀石流通。窮黎得資接濟。如該商等抗違隱匿。即將糧石入官平糶。仍治以應得之罪。○道光二年

諭京城鋪戶囤積米石。私運出城。例有明禁。著步軍統領衙門順天府五城一體嚴密稽查。如有米店碓房

違例囤至五百石以上者。即行照例懲辦。並嚴飭該管員弁於各城內實力訪拏。毋任稍有偷漏。○咸豐

六年

諭本年京官俸糈及八旗兵米均按季按月支放。京師民食本屬足敷周轉。何至旬日之間米價驟長。幾至加倍。雜糧亦復昂貴。顯係市僧姦商把持行市。射利居奇。實於小民生計大有妨礙。必應嚴加懲創。以儆刁風。著步軍統領衙門順天府五城先行出示曉諭。米鋪各商人等。於米石雜糧務均糴糶。儘查有私行囤積。擡價居奇。把持行市。以致妨礙民食者。即著各

該衙門嚴拏交部治罪。亦不得任聽吏胥藉端需索。致多擾累。○十一年奏准。嗣後各商。儻有逾數囤積。並遲至三月不行糶運者。照違制律治罪。所囤之糧。酌量平糶。○光緒七年奏准。四川省太平縣亢旱歉收。查獲違禁燒鍋多名。照例各擬枷杖。其已燒酒麪。作值銀六十五兩零。變價充公。

欽定大清會典事例卷一百九十二

戶部

積儲

裕備倉儲
倉儲交代

倉儲耗折

盤查倉糧

裕備倉儲。○康熙三十年議准。直省捐穀。每州縣再加儲一倍。其捐米內有高梁。交春易於紅朽。令即出糶。買粟補倉。以備賑濟。○三十一年議准。山東夏秋二季。每畝應捐米麥。秋成後即令易穀。併作一次。每畝共捐穀四合。除省有倉廩外。其無倉廩之州縣。地方官酌量修葺。加謹收儲。陝西西安鳳翔二府。及福建浙江均照此。

例捐輸。○三十三年奏准。山東運至

盛京之糧。由金州等處海岸經過。酌量截留。減價發賣。再遼陽岫巖鳳凰城三處之人。向來俱在牛莊買米。亦照金州等處將糧米截留。○又奉旨。發霸州文安等處貯倉米穀十萬石。除散賑外。皆減價平糶。並截留山東漕米。於景州等處發糶。以平米價。○三十四年

諭。北地寒冷。米穀多至失收。今河水方盛。著將通倉米運至密雲順義各一萬石。令貯倉備用。○四十二年諭。山陝不通水路。若稍遇災歉。即至艱窘。今值糧米充

裕之時。無有急於各地方積貯者。令督撫等將豫備之處。盡心究議。欽此。遵。

旨議定。陝西人口衆多之州縣。儲米三千石。次二千石。又次一千石。交與地方官採買存儲。動西安司庫兵餉銀十四萬兩。以十萬兩照時價買米。以四萬兩蓋造倉廩。甘肅所屬向無倉廩。動用常平倉糧內十分之一。蓋造。將此項糧石。照數填還。再陝甘二處。照依應徵地丁銀一錢米一斗者。令捐輸糧三合。以為備災之用。歲數停捐。○四十二年覆准。江甯倉捐米八萬七千餘石。久

儲必致。范爛。照常平倉。每年存七糶。三秋成買補。○四十四年議准。豫省河南府。居數省之中。積穀以備賑濟。山陝之需。今將四十二年漕米。每米一石。易穀二石。共穀四十六萬五千六百八十二石。於河南府收儲穀二十三萬五千六百八十二石。造倉廩二百九十三間。其餘二十三萬石。於近汴近洛之祥符縣儲三萬石。中牟縣儲二萬五千石。汜水縣儲二萬石。鞏縣儲二萬五千石。澠池縣儲二萬石。偃師縣儲二萬八千石。陝州儲二萬七千石。靈寶縣儲二萬八千

石。閩鄉縣儲二萬七千石。共造倉廩三百六十四間。嚴飭加謹收儲。每年於青黃不接之時。出陳易新。照依三分之一。借給農民。秋後還倉。○雍正元年議准。截留漕米六萬二千五百九十石。於河南衛輝府倉存儲。撥運陝州。收捐米二萬石。於懷慶府倉存儲備用。○四年議准。福建臺灣除常運平糶米五萬石外。動正項錢糧運米十萬石。存邊海地方備儲。若遇臺灣豐年。酌量加運。廣東通省府州縣存儲數多者。開倉平糶。即將價銀交數少之州縣買儲。再將廣西捐

穀糶三價值。仍令採買穀石。運交廣東分儲。○
五年奏准。浙江常平倉。於前定指數七十萬石
外。加倍捐至一百四十萬石。按大中小縣分別
存儲。○又

諭。設米穀倉六所。於江南泰州通州如皋鹽城海州板
浦附近商竈地方。以備賑濟。○七年奏准。臺灣粟石。
止可存備全臺並廈門金門等處兵糧。茲將官
莊現存粟四萬九千餘石。價銀七萬三千四百
餘兩內。抽撥採買。運到漳泉二府。永為定例。○
又奏准。浙省溫處各屬。舊存穀石。有一二萬三

四萬不等。嘉湖甯紹等處少者四五千。多亦不
過七八千。惟省城旗營駐防。更為緊要。永濟倉
捐納補漕案內。應購米四十四萬餘石。除分儲
金衢嚴三府。及備借兵米外。餘悉儲本倉。今酌
定應儲穀四十萬石。抵米二十萬石。其餘共應
買穀四十八萬石。於通省中按縣分大小。水陸
衝僻。或僅為本地之儲積。或可備鄰境之轉輸。
酌定數目。除原存外。少者添撥。每年存七糶三。
秋成補還。○又議准。山東各府並附郭首縣。儲
穀二萬石。大州萬八千石。中州大縣萬六千石。

中縣萬四千石。小縣萬二千石。大衛萬石。中衛五千石。小衛二千五百石。大所三千石。以此定額。其地要民稠。或積窪易潦者。酌加二三千石。如有缺額。動帑買補。○九年覆准。江蘇所屬十二府州。備儲倉糧。動支藩庫銀。委官赴產米地方。分頭陸續採買。大縣儲米萬五千石。中縣萬石。小縣八千石。穀則倍之。凡遇緩急。於存七糶三之外。酌量平糶。即將原銀解存府庫。秋收後報明。俟米價平時。即行領買。或有贏餘銀。多購米穀存儲。○十年覆准。江南崇明縣。孤懸海外。

即於前項買米案內買撥萬石收儲崇明縣倉。遇米價昂貴該縣平價出糶俟米價平減隨即買補足數。○乾隆十一年議准福建福興漳泉四府民食倉儲不能不仰藉臺灣運濟。今臺屬各廳縣於本年三月內買足四十萬石之穀。永為定額。遇有內地撥用即於實儲四十萬石內動撥。將藩庫現存銀隨時發交臺灣買補足額。仍將買補穀數價值分析造報。至運穀搭運商船已至內港。因駕駛不慎船被閘損。漂失米穀。及雖在外洋遭風。其船無實在擊碎形迹。舵工

水手皆存。牌照無失者。概不准豁免。仍著落行保船戶。照時價賠補。其有在外洋遭風。舵工水手漂失無迹。及在外洋橫礁擊碎。有實在形迹可驗者。即具切實供情印甘各結。先將商船遭風失水情形。米穀數目。逐案咨部查覈。仍俟歲終。將應豁各船米穀彙案報題豁免。永為定例遵行。○十三年覆准常平倉穀之外。別有儲穀如河南之漕穀倉。儲穀七十七萬五千一百四十三石有奇。江甯省倉。現儲穀萬二千石。乾隆七年奏明。請動銀五萬兩。採買補倉。因價昂未

買福建之新設臺灣倉。奏請備儲四十萬石。現存三十九萬六千七百十有六石有奇。浙江永濟倉。儲米八萬七千四百三石有奇。玉環同知倉。儲穀六千石。廣東廣糧通判倉。存穀九萬二千七百八十五石。平糶穀六千三百四十五石。存價銀三千三百八十四兩有奇。均因地制宜。以資接濟。皆不在常平額內。令各省督撫照舊存儲。又江南崇明縣倉。儲米抵穀二萬石。因孤懸海外。特加儲備。亦照舊存留。○十八年議准。湖北為江浙上游。界連秦豫。各省偶有缺乏。俱

藉資於楚米。而湖北額穀止五十二萬石有奇。較之各省。尚不及額多者三分之一。應於舊額之外。加儲四十萬石。存為鄰省協撥之用。○二十四年奉

旨。景州以北水次州縣。二次截留漕糧共四十萬石。酌量分貯。○二十七年議准

盛京旗倉。除支用外。所存不過十餘萬石。民倉不過三十萬石。照例糶賣。所存無多。令各州縣加儲粟米二十萬石。價貴則發糶以濟民食。價賤則糶補以免傷農。並令沿海各倉。加儲黑豆五

萬石。以備運通之用。○又議准。山西大同府屬之豐鎮廳。朔平府屬之甯遠廳。係衛所改設。其常平倉未經設立。查豐鎮廳。每年應徵米一千四百七十石。甯遠廳。每年應徵米五千一百六十七石。以十年計之。共得米六萬六千餘石。即以勻儲二廳。作為常平額糧。動用耗羨。添建倉廩存儲。○四十二年奏准。安徽鳳潁二府屬。添建豫備倉廩。不拘豆麥雜糧。增儲二十萬石。分儲鳳陽壽州。鳳臺亳州。阜陽霍邱。蒙城太和。潁上等州縣。以備鳳泗二屬就近撥協賑濟。如遇

無需動用年分。照常平糶易之例。於糧價昂貴時存七糶三。減價平糶。若遇儲穀年久。亦一律出陳易新。其有無動用。均照常平倉穀。於每年歲底一律盤查。奏銷結報。○五十五年奏准。四川附近水次各州縣。加儲穀三十萬石。現在穀價平減。再分買穀五十萬石。以備本省平糶及接濟鄰封之用。○嘉慶二年覆准。四川秀山縣常平倉穀。按照例價。加買穀一二萬石。用資儲備。○道光二年

諭。黔省各屬額貯倉穀。前經該省奏明分年買補。茲據

糜奇瑜奏稱。向來穀價一項。有已提存藩庫者。亦有
僅存各道府庫。並存留各廳州縣庫者。請一併提至
司庫。以歸畫一等語。所議章程俱是。著照所請辦理。
如有延不批解者。該撫即嚴叅究辦。仍察看秋成豐
稔。發價買補。以地方之大小。定採買之多寡。其應買
穀數。在二三千石以內者。勒限一年買足。五六千石
以內者。勒限兩年。七八千石以上者。勒限三年。一萬
石以上者。勒限四年。如穀數較多。於年豐穀賤時。酌
量加買補足。總不得逾五年之限。儻各該員於限內
離任。務須以實穀貯倉交代。概不准將例價折交。嗣

後如再有以例價流抵及後任徇情濫接該撫查明一併叅辦以除積弊而實倉儲。○十五年

諭。戶部奏查覈常平倉穀額貯虧短現存未買各數目。

按各省冊報開單呈覽朕詳加披閱各省現存穀僅止二千四百餘萬石。歷年動缺穀一千二百五十餘萬石。虧缺徵變穀二百七十餘萬石。糶缺借缺穀三百十餘萬石。雖尚存有糶價銀一百十餘萬兩。並未隨時買補。統計缺短穀一千八百餘萬石之多。幾及額貯之半。節經該部逐年行催並不詳細登覆實屬疲玩積貯為民食所關。國家設立常平倉為有

備無患之計。各該省遇有動用。必須隨時買補。顆粒無虧。以期緩急有恃。近年各省倉穀動缺如此之多。總由各州縣玩視倉儲。既不慎重出納。該管上司復不實力稽查。若不亟加整頓。已缺者永無歸補。現存者任意侵移。尚復成何事體。除因公動缺穀石較多。一時全行買補。恐於民食有妨。責成各督撫另籌陸續歸補外。其存貯穀價銀一百十餘萬兩。著各該省督撫迅飭各該屬察看情形。即行買補還倉。如有藉端勒索。剋扣等弊。惟該督撫是問。至各員虧缺徵變穀石。著查明按限追繳。如仍前延宕。即指名嚴叅治

罪。毋稍寬縱。糶缺借缺等項穀石。除現存糶價外。借缺穀石。有無徵還。糶價銀兩。有無存貯。曾否提解司庫。著即逐細查明。報部備覈。現存穀石。著飭屬加謹收貯。遇有因公動用及出陳易新之處。詳明該管上司。即專案報部查覈。仍飭隨時籌買歸倉。儻有虧缺。即嚴叅示儆。若扶同徇隱。查出一併治罪。如動用後不專案報部。查出即著落擅動之員賠補。以歸覈實。所有各省倉糧奏銷案內動缺虧缺。未據造冊報部。及歷年倉糧奏銷。未經題報者。著速行分別造報。毋再延宕。並查取造報遲延職名。送部覈辦。以儆玩延。

而重積貯。○同治三年

諭。為政之要。首在足食。各直省州縣設立常平社倉。國家承平。留以備凶荒之用。一旦有事。恃以為緩急之需。所以為未雨綢繆之計者。法至善也。近來軍務繁興。寇盜所至地方。每以糧盡被陷。推原其故。總由各州縣恣意侵挪。任令米粟空虛。遇變無所倚賴。又或聞警逃遁。齎盜以糧。以至守禦無資。生民塗炭。興言及此。罪有攸歸。嗣後各省常平社倉。責成督撫大吏。認真整頓。廢者復之。缺者補之。隨時稽查。凡官倉民倉。未動之穀。不得變價提用。至於倉穀已缺。紳民捐

資彌補者。尤應加意保全。務使倉穀豐盈。以期有備無患。此旨著該部迅即通行各省。即著各該督撫將各該州縣倉儲實存若干。有無虧缺。查明據實覆奏。倘復因循玩忽。任聽州縣侵漁虧缺。定將該上司及州縣一併從重懲處。用示朝廷貴粟重農之意。○八

年

諭。常平倉為積儲良策。自軍興以來。各省倉穀率多空虛。亟應及早籌補。以備災歉。著各直省督撫督飭該管道府按屬查報。應如何籌款分年買補。並嚴杜州縣侵挪之處。即行妥籌辦理。

倉儲耗折。乾隆四年議准。浙江永濟倉建設省會。地方潮溼。所儲米糧。嗣後除春糶本年買補新米及已經易穀者。不議耗折外。其餘米糧存儲一年之後。准其每石銷耗一升。至次年每石銷耗五合。遞年照次開銷。陝西甘肅各州縣收捐之糧。及常平倉收儲之糧。除本年所收者。不准開耗外。至收儲次年以後。三年之內。每石每年。准其開耗一升。作正報銷。三年之後。不准再減。其延安府徵收本色糧米。准其每石收耗三升。留充折耗之用。雲南稅秋糧米。有耗之府。

廳州縣每石收耗三升。正耗之外。復收鼠耗三升。於民有累。應將正耗三升。減出作為鼠耗。其外收之鼠耗三升。概行豁免。無耗之州縣。仍准徵收鼠耗三升。以備折耗。其餘直隸各省。地勢有燥溼不同。積儲米糧。亦有多寡不一。因地制宜。毋庸開耗。○七年覆准。陝西西安。延安。鳳翔。同州。榆林五府。邠州。乾州。綏德。鄜州。四州。風土高燥。所屬州縣倉糧。從無微變。毋庸開報氣頭。廠底。其漢中府屬之甯羌。南鄭等九州縣。興安州。今改府。及平利。石泉等六縣。商州所屬之雒南。

等四縣。地既卑溼。所產又多稻穀。性不耐久。遞年挨次出易。地僻民稀。不能照數易新。自應仿照京倉開報氣頭。廩底之例。酌定成規。以免賠累。其儲倉已過五年者。照京倉例。酌減十分之三。若儲倉未過五年。及已開報氣頭。廩底一次者。均不准開報。○八年題准。浙江各倉。除臨安。於潛。嶧。縣。泰。順。等縣。毋庸置議外。其餘各屬倉穀。如甲年買儲之穀。於乙年糶三糶四。尚有存七存六。於年終盤查時。照存儲一年例。每石開報氣頭穀三合。廩底穀一合。其存七存六穀。於

丙年又經糶三糶四。尚有存四存二。於年終盤查時。照存儲二年例。每石開報氣頭六合。廠底二合。其存四存二穀。於丁年全數出糶。毋庸開報氣頭。廠底糶半之縣。將甲年存儲穀。於乙年歲終盤查。將存半之數。每石開報氣頭三合。廠底一合。總計穀一石。第一年開報四合。第二年開報八合。共開報穀一升二合。年終報部查覈。○九年覆准。廣西平樂府屬恭城等十五州縣。尚屬高燥。所存倉穀。自可毋庸開報氣頭。廠底。桂林等府所轄之廳及州縣六十有四屬。除三

年之內。已將存倉穀按數出易。其未易之穀。為數無多。並碾運古州兵餉。以及有別案撥用等項。不准開報氣頭廠底外。如三年之內。全未出易。存倉之穀。自乾隆八年為始。將十分之三開報。每千石內。以三百石開報氣頭廠底。每百石開報氣頭穀一石。廠底穀四斗。如存儲未及三年者。不准開報。○十一年覆准。江南地勢最卑溼之常熟等二十州縣。每年每石開報氣頭廠底一升。地勢潮溼之長洲等二十四州縣。每年每石開報氣頭廠底五合。其存儲未及一年者。

毋庸置議。米麥粟穀雜糧等項。照數開報。三年之後。不準再請開銷。統以乾隆十一年為始。扣數開報。至上元等二十三縣。毋庸開銷。氣頭廠底。再氣頭廠底穀。照浙省之例。九成八成者。每石減價銀七分。七成六成者。每石減一錢。五成者。減一錢四分。委官勘明。照減價發賣。造冊報部查覈。○四十一年議准。地糧項下額徵存倉米石。奉天省地糧。每石徵收加一耗米。作為存倉折耗。及鋪墊修倉等項之用。

盛京戶部所屬之錦州甯遠鳳凰城岫巖復州等

旗倉每石徵耗米三升。以備折耗。黑龍江齊齊哈爾。墨爾根。三城官屯米石。每石徵收耗米三升。存倉米石。三年之後。每石開耗一升。吉林官莊米石。每石徵耗米三升。以備折耗。直隸永平。宣化。二府。暨易州屬之廣昌縣屯糧。每石徵收加一耗米。以三升留為鼠耗之用。七升變價歸公。山西額徵米豆。大同朔平二府。官運者每石收耗四升。以二升為沿途折耗。二升為存倉鼠耗。太原等府州屬。理事通判州判倉官巡檢經管者。每石收耗三升。同知通判州縣經管者。每

石收耗二升。忻州每石收耗三升。定襄縣每石收耗二升七合。靜樂縣每石收耗二升八合。均留倉備用。福建額徵秋屯糧米。每石加一收耗。又併餘二升。共一斗二升。內一升為支放折耗。餘為各官養廉。湖北武荆襄鄖均穀城。東湖等七倉南糧。每石收耗三升。以補折耗。陝西延安府。豫備倉額徵糧石。每石收耗三升。以補折耗。廣西額徵米石。每石加一收耗。以為鼠耗。運腳修倉等費。雲南額徵秋糧。每石收耗三升。以備折耗。○又議准。常平倉米穀雜糧。奉天承德遠

陽海城蓋平鐵嶺復州開原錦州甯遠廣甯等
十州縣。凡四萬石以上米逾五年穀逾十年及
廩座建造五年以外者。每一萬二千石。開銷氣
頭一百石。廩底二十石。直隸天津北倉。凡收儲
在三年以內。每月每石減耗米一合一勺六抄。
三年以後。一萬石以上。開報氣頭一百五十石。
廩底四十石。江西甯州武甯靖安宜春萍鄉萬
載廬陵吉水永豐永甯臨川金谿崇仁樂安東
鄉南豐新城廣昌上饒玉山廣豐鉛山弋陽貴
溪興安樂平浮梁安仁德興萬年星子都昌建

昌安義瑞昌大庾南康上猶崇義甯都興國瑞
金會昌龍南安遠石城等四十六州縣倉穀儲
及三年以外者每一萬石開除氣頭穀四十石
廩底穀一十石南昌新建豐城進賢清江新喻
新淦峽江泰和鄱陽餘干德化德安湖口彭澤
等十五縣倉穀儲及三年以外者每一萬石開
除氣頭穀六十石廩底穀十二石南昌袁州臨
江吉安撫州廣信饒州南康九江南安等十府
倉俱照附郭首邑南昌等縣一體開報氣頭廩
底福建除臺灣四縣並屏南連城福安大田德

化等縣。不隸開報氣頭。廩底外。其餘各府州縣。收儲已過三年。數在二萬石以上者。每石報氣頭八合。廩底二合。湖北驛鹽。荊州二道倉。並武昌。漢陽。黃州。安陸。荊州等五府。及江夏。武昌。監利等各州縣倉。收儲三年以外。每穀一萬石。開報氣頭四十石。廩底一十石。湖南。湘陰。瀏陽。益陽。永州府。及所屬之零陵。祁陽。東安。道州。甯遠。永明。江華。新田。岳州府。及所屬之巴陵。岳州衛。常德府。及所屬之武陵。桃源。辰州府。及所屬之沅陵。溆溪。辰溪。漵浦。水綏廳。沅州府。及所屬之

芷江黔陽麻陽永順府屬之永順保靖龍山桑
植等三十二府廳州縣衛收儲三年以外者每
倉穀一萬石開報氣頭四十石廩底一十石龍
陽沅江華容安鄉等四縣每倉穀一萬石開報
氣頭六十石廩底一十二石廣東廣州府及所
屬之南海番禺東莞順德新會惠州府及所屬
之歸善海豐陸豐潮州府及所屬之海陽潮陽
揭陽饒平惠來澄海廉州府及所屬之合浦等
縣並廣糧通判經管之省倉共二十處地屬最
溼肇慶府及所屬之高要廣州府廣糧通判經

管之三水廣益倉。惠州府屬之河源博羅永安。潮州府屬之普甯嘉應州。及所屬之興甯長樂等縣。共十處。地屬次溼。最溼之處。有收儲二年之外。次溼之處。有收儲三年之外。全未出易。及出易未及糶半糶三之數者。均每千石內。以三成開報氣頭。廩底每百石。開氣頭穀一石。廩底穀四斗。○又議准。哈密堆儲糧石。一月後。每月每石。開報折耗糧一升。巴里坤闡展。托克遜喀喇沙爾烏魯木齊伊犁烏什北路科布多。收儲糧石。於收儲一月後。每月每石。開耗糧八勺三

抄三撮。俱三年後停止。○四十四年議准。兩金川各屯。收穫糧石。存儲在倉。及本屯支放兵糧。每石開耗五合。撥運各屯。開耗一升。每年開耗確數。造冊報部覈銷。○四十五年議准。川省打箭鑪裏塘。巴塘各倉存儲米石。出倉支放。每石開銷鼠耗五合。撥運別臺。每石開銷沿途折耗一升。○嘉慶七年議准。福建額徵秋屯糧米。每石加一收耗。又併餘二升。共一斗二升。內一升為支放收耗。餘俱行令易穀收倉。另廠存儲。僅有官吏浮收折收情弊。即行叅辦。奏銷考成。每

年同糧米冊籍併案具題。新舊交代。另冊結報。如因公動撥。隨時奏明辦理。○道光六年

諭。那彥成奏。被水淹浸倉穀。分別出借售變。豁免著賠一摺。直隸成安縣地方。夏間猝被漳河漫水下注。倉穀間被淹浸。前據該督飭令搬運曬晾。茲盤量確數具奏。除常平倉盤出乾穀。照數加謹收貯外。其受潮曬晾乾穀二千八百五十二石。被浸難以久貯。著照所請。飭該縣照依時值變價。秋後易買好穀還倉。不准派買派賣。社義二倉乾穀二千七百三十六石。五斗。並義倉受潮曬乾穀一千四百五十六石。共穀四

千一百九十二石五斗內。以一千二百石作為籽種。二千九百九十二石五斗作為口糧。均勻出借。秋後查看收成分數。分別加免息穀。催追還倉。至常社義三倉徵變穀九百一十四石五斗。係因曬晾不善所致。著落該縣照數賠交。秋後買補還倉。不准以價作抵。其折耗穀一千四百八十七石三斗零。碎被水衝致有損失。加恩准其豁免。仍於奏銷案內。分別覈實造報。

盤查倉糧。○康熙三十九年覆准。凡州縣收儲米穀。遇颶風大雨等災。輒運江海飄流並微爛。

者。該督撫題參革職離任。限一年內賠完。免罪復職別補。如逾一年之限賠完者。止免罪不准復職。二年之內。如不賠完。仍照例治罪。著落家產追賠。○四十一年覆准。凡官員將存倉米穀虧空微爛者。該督撫題參。照例革職留任。限一年賠補。賠完。仍准復職。如逾限不完。解任。再限一年賠完。仍准復職。如二年外不賠完者。照定例擬罪。著落家產追賠。○四十三年覆准。各省州縣虧空微爛倉糧。實在賠補完日。令該道府印出實在補完印結。報明督撫藩司存案。備再

有虧空之事發覺。將該道府一併議處。○四十七年議准。州縣官於額儲積穀之外。買穀儲倉。照盤查贏餘之例議敘。或州縣官捐穀本管倉內。捐少報多。或將現儲之米。捏作捐輸。以邀議敘。後本官任內。復有虧空事發。除知府照例分賠外。原報之督撫。一併議處。○五十二年

○六十年

諭。徵糶倉穀官員。限內賠完。仍以原官補用。不得別補。○
諭。古人云。三年耕則有一年之蓄。九年耕則有三年之蓄。言雖可聽。行之不易。如設立社倉。原屬良法。但從

前曾經舉行。終無成效。至於各省積貯穀石。俱報稱數千百萬。實在存倉者無幾。即出陳易新之法。亦不為不善。第春閒僅有所出。秋後並無所入。州縣官侵蝕入己。急則以折銀掩飾。此等積弊。朕知之甚詳。其報荒之真偽虛實。朕亦無不洞悉。如熱河所積穀石。每年減價平糶。秋收糶補還倉。數目無多。稽查頗易。所以每有餘糧。著大學士等詳議具奏。欽此。遵

旨議定。各省州縣現在存倉米麥穀石。令該督撫嚴查。如有虧空。勒限補足。○雍正元年奏准。各省存倉米石。雖有司道知府盤查。不能保其一無徇

私當責之督撫嚴加覈實。造冊具奏。督撫離任。將冊籍交代新任。限三箇月查覈奏聞。如有虧空。即行題參。徇庇者議處。仍令分賠。○二年議准。直省督撫將各州縣積儲倉穀。孰係本色。孰係折色。並實存本折數目。稽查明白。分析題報。如果無虧缺。及以折色作本色等弊。照元年議准之例。歲終出具印結送部。僅有此等情弊。即行題參。一面買補還倉。一面著落本人追賠。至於道府州縣。有當穀貴之時。私將倉穀發賣。或販往穀貴之所糶賣。希得重價肥己者。以及地

方大員。有將捐穀不收本色。擅自折銀。或以所收銀每石短價散給州縣。抑派里民買補運送者。或被旁人首告。或被科道糾參。將督撫等官交部從重議處。○三年議准。凡州縣虧空倉穀。即令接任各官。於秋成穀賤之時。申詳督撫藩司。酌動何項錢糧。照時價先行買補。該州縣出具倉收。該管道府加具印結。一面報部。一面於虧空官名下。勒限一年。將動用帑銀。照數追補還項。如逾限不完。照侵挪倉穀定例治罪。仍著落本人家產變抵還項。○四年

諭凡虧空錢糧猶可勒限追還無損國帑若虧空倉糧則一時旱潦無備事關民瘼是虧空倉穀之罪較虧空錢糧為甚自宜嚴加處分著大學士九卿確議定例具奏欽此遵

旨議定倉穀虧空處分以穀一石比照錢糧五錢定罪嗣後虧空倉穀係侵盜入己者千石以下照監守自盜律擬斬准徒五年千石以上擬斬監候秋後處決不准赦免將侵盜穀數動支正項買補著落本犯妻子名下嚴追係挪移者除數止千百石照律准徒五千石至萬石照律擬流外

萬石至二萬石。發邊衛充軍。二萬石以上者。照
侵盜例擬斬。其虧空之穀。動正項銀買補。於各
犯名下。勒限一年追賠。○五年議准。各省常平
倉。每年春閒出借。秋後徵還。務於十月內全完。
造冊送部。歲底令知府直隸州盤查。逾限不完。
或捏造冊收。俱行叅處。仍照數追賠。如有影射
作弊。冒借入己者。紳衿黜革。牙蠹拏究。所欠穀
石。加倍追還。鄉保有無受贓。分別治罪。再倉穀
出糶之時。姦商勢豪。串通捏名零星糶出。囤積
射利者。地方官嚴行查禁。州縣以糶為借。掩飾

虧空者。分別侵挪定罪。其盤查之道。府州並該管之督撫。隱匿徇庇。照例處分。仍將虧空倉穀著落分賠。○又

諭。福建通省倉穀虧空甚多。朕特遣大臣等前往盤查。但恐不肖有司等。聞欽差將至。向紳衿富戶挪移借貸。以掩飾其虧空之項。而紳衿富戶等。或畏其威勢。或迫於情面。不得已代為應付。以圖掩飾。彌縫於一時。均未可定。朕此番之差遣大臣清查。斷不容有絲毫之蒙混隱匿。儻將資財穀米借出。便為官物。斷斷不能退還。用是明白曉諭。俾毋墮貪官劣員之術中。

使地方積弊永除。而後任官員亦共知儆戒。不致仍蹈前轍。著將此通行福建郡縣鄉村。咸使聞知。○九年奏准。湖南各屬常平倉。雍正五年存七糶三者。三十八州縣。儘數減糶者。二十五州縣。歲終冊報買補者。僅有其半。並無府結到司。嗣後應將平糶價銀。解府州儲庫。秋間具領買補。儘遇穀賤。領價贏餘。令其儘數買儲。若秋歉穀貴。買補之價。浮於減糶之價。州縣不能賒墊。亦令報明具題。委員盤查。如果顆粒無虧。具結詳報。僅有缺少虧挪。或折價抵穀。及將行戶領狀混行。

掩飾者。立即揭叅。仍令解任賠補。至該管道府亦定限於十月內盤明。加結詳司。年終據實總冊彙送。逾十月不行詳揭者。照徇庇例叅處。○乾隆四十一年議准。常平出借糧石。每年奏報倉糧時。除去因災停緩數目外。彙覈未完各數。凡統計不及穀一百石者。經徵之員免其開叅。百石以上者。照雜項錢糧未完例開叅。因災停緩倉糧歸入應徵年分。統覈完欠。分別叅處。○五十一年奏准。各營借碾兵米。責成該管府州就近嚴查。如該州縣將新存之價存儲不買。及

秋冬仍在常平借碾。卽照私挪倉穀例嚴叅究辦。該管府州徇隱不揭。一併叅處。○又奏准。各州縣實存倉糧等項。開具四柱清冊。每月報明本府。查覈無缺。按月出具印結。報明本道。該管道員。按季出具無虧印結。移司加結。轉送督撫存覈。儻州縣有私行挪動之事。立即親往盤查。將侵虧之員。與出結之府州。一併嚴叅治罪。如督撫查出弊竇。而司道未經舉發。並將司道以贍徇叅處。○嘉慶元年議准。州縣以糶借為名。掩飾虧空。該督撫卽行指叅。嚴審是侵是挪。分

別定罪追賠。該管道府直隸州。有不時盤查之責。如有徇隱失察等情。亦即題參。照州縣官侵挪錢糧。知府徇隱失察例。分別辦理。所虧倉穀。著落賠補。如道府直隸州已經揭報。督撫不行題參。將督撫亦照徇庇例議處。所虧倉穀亦照例分賠。○道光四年

諭。戶部奏湖南省各屬常平倉穀。共計短缺二十九萬餘石。據該撫查明致缺之由。並無官侵吏蝕情弊。分別有著無著。勒限追賠。著照所議。其有著項下。除本員經放穀價。民欠未完。應由現任催追。又因市價昂

貴。本員領價未買。並前任短缺倉穀折價移交兩項。均勒限十日內。令各本員將原領原文銀兩。解交司庫外。其餘各本員應賠己身交代盤折。及認賠無著民欠。並歷任盤折等數。著落各本員完繳。數在三千石以下者。勒限半年。將穀價解交司庫。數在三千石以上者。展限半年。總不得過一年之限。自道光四年秋季起。至五年夏季底止。一律埽數完繳。如仍前延玩。著即分別撤叅。照例究擬監追。其無著項下。如遠年民欠。並歷任盤量折耗。以及虛款作抵等項。即著落此次盤查以前。通融出結各員。勒限賠補。數在一

千石以下者。勒限半年。一千石以上至二千石者。勒限一年。二千石以上至四千石者。勒限兩年。四千石以上者。統限三年。自道光四年秋季起。至七年夏季底止。將穀價按限完解。儻延不批解。或繳不足數。積壓一半年者。停其升轉。兩年者。分別撤叅。逾違統限三年者。即究擬監追。以上限追各員。遇有升調及事故離任。均勒限完繳清楚。再行給咨。並將有著民欠佃欠。即飭現任人員。於秋成後一律追齊收倉。以本年十月內為率。如追不足數。著照承追之員賠補。其巴陵桂陽二縣書役所欠之穀。應飭查提監追。限半

月內完繳。如有逾違者。即分別治罪。至各員應補倉穀。從前不即買補。民佃欠繳。又不上緊催追。以及歷任通融接收各員。與失察之該管各上司。本有應得之咎。經該撫查明前項缺穀。究與侵挪不同。且自盤查以來。合計已繳穀一十二萬三千餘石。各員尚知愧奮。所有此等歷時既久。人數較多。應得處分。俱著加恩寬免。仍著該撫嚴飭各屬上緊催追。如再有逾限不完。及完不足數者。除將本員嚴叅懲辦外。仍將從前失察之該管各上司。從重議處。並著該撫督飭該道府州。將所屬存倉穀石。隨時查察。如有虧挪情

弊。立即嚴叅究辦。毋稍徇隱。○五年

諭。李鴻賓等奏查明各州縣歷年盤折倉穀。勒限買補一摺。湖北漢陽等府屬二十州縣。額貯常平倉穀。因歷任交代盤折。及氣頭廠底鼠耗。共缺穀三萬七千六百九十餘石。俱將穀價流交。存貯州縣各庫。尚未買補。據該督等查明將交存前項價銀。提貯司庫。請勒限採買足額。著照所請。即飭將漢陽漢川孝感黃岡蘄羅田鍾祥京山江陵石首監利松滋枝江襄陽棗陽宜城南漳均光化穀城二十州縣盤缺倉穀。察看本年秋成豐稔。即飭該州縣勒限三箇月。如數買

齊以實倉貯。如再逾限未能買補。即行指名嚴叅。從前違例折價各員。姑念官非一任。事非經手。免其追究。自此次盤查清釐之後。儻再將盤缺倉糧擅行折價接收。容隱不報。一經查出。著即將前後任各員。一併嚴叅究辦。毋稍寬貸。○七年

諭。嵩孚奏查明各州縣盤折徵變穀石。勒限賠繳。並請免叅處一摺。湖北省額存倉穀。經該督盤查。共虧缺二萬二千九百七十四石零。內除盤折穀石。已據該州縣繳存價銀。尚未買補外。其氣頭廠底徵變穀石。顯係該州縣經理不慎所致。乃以濱臨江湖。地處卑

溼倉穀易致浥爛為詞。請免處分。各省沿江沿湖州縣甚多。若皆以此藉口。豈能概從寬貸。著該督即查明各該州縣徵缺之多寡。開送職名。交吏部分別議處。並勒限追賠價銀。此內除大冶京山二縣。已將價銀解繳司庫。孝感黃岡東湖歸州巴東各州縣。並沔陽衛六處價銀。已分別解貯府州縣庫外。其孝感黃岡二縣。及沔陽衛三處。係每石以銀六錢五分作價。恐不敷買補。著責令一律按每穀一石。價銀一兩。分別補足。同解存價銀。一併提解司庫。至咸甯通山漢陽黃陂沔陽五州縣。未繳穀價。亦著按每穀一石。解

府。前往徹底清查。具結咨部。倘有虧挪。而委員不實力盤查。通同弊混。捏結詳報者。查出一併嚴叅究處。○又議准。各省督撫藩司到任。委盤倉穀。勒限三箇月盤清結報。不准另扣程途日期。廣東甘肅統照三箇月例限盤查。其地方道路遠近。按日扣除程限。福建臺灣一府。遠隔重洋。藩司委盤該府屬倉糧。亦准扣除程限。奉天並未設有藩司。即責成該管上司實力盤量。按照倉穀多寡。程途遠近。定限一箇月。兩箇月。盤量結報。至藩司到任。或與督撫莅任同時。或相

隔未久。或值年例盤查之際。均令併案辦理。藩司到任。甫經盤查。即遇升調。新任藩司到任。以及暫時遞行委署。在三箇月以內。毋須再盤。令新任藩司出結詳報。督撫報部查覈。○四十年議准。交代倉穀。每穀一石。驗春米五斗者。新任按數接受。不准篩颺。其以穀價交代者。覈明舊任原係奉文出糶。糶價無虧。遲買有案者。令新任詳明接受。俟價平採買。毋得勒指推諉外。其係舊任私糶短價。及雖係奉文出糶。而於應買時。因循不買。價值存庫者。新任即據實揭報。舊

任照例叅處仍留任所。勒限買還報部。○五十一年奏准。各州縣交代。凡遇缺穀。查係前任官私行盜賣者。立即揭叅治罪追賠。即或盤量折耗。亦必於交盤限內。令舊官買交清楚。方許結報。儻值青黃不接。難以驟買。令新官覈明確數。按照時價。繳存府州庫內。並一面通報。毋許彼此通融。一俟秋成。立即發買補額。由該管府州驗明結報。儻逾期不買。後任官扶同接收。訪查得實。即將新舊官一併叅辦。該管府州知情徇隱。一併嚴叅。○道光二十三年

諭。劉重麟奏請飭查倉儲一摺。各直省州縣設立常平社倉等。原以備水旱緩急不時之需。豈容稍有虧短。其有因微變等情。不能不出陳易新。亦應隨時買補。以歸實貯。若如該副都御史所奏。近來州縣倉廩。多成虛設。交代之日。即將所短穀米等項。算作價值。輒轉移交。以致存價不買。或致挪移混抵。雖此項價銀。或經該上司提存司道各庫。而請領到手。或仍挪解別款。虛出倉收。或支吾推卸。不肯領解買補。是現在各省倉儲。竟係有名無實。著各督撫即將所屬各州縣常社諸倉。應存穀米實數。確切查明。務令實貯在

倉。其有存價未買者。即飭令趕緊買補。不往再以價值移交後任。或其價現已提存司道各庫者。亦即飭令具文請領。買補歸倉。毋許藉詞推諉。其有領價後挪解別款。虛出倉收者。即著嚴行叅辦。